

1279-1279- OFP - Acta Capitulum Generalium Parisius Celebrati

In nomine patris et filii et spiritus sancti. Amen.

Acta capituli generalis Parisius celebrati
anno Domini · M^o · CC^o · LXXIX ·

Confirmamus hanc constitutionem. In capitulo de electione prioris provincialis. addatur. priores provinciales. cum fuerint absoluti. ad illos conventus pertineant. de quibus fuerint assumpti. nisi per superiores suos aliter fuerit ordinatum. Et hec habet · iii · capitula.

Iste sunt approbaciones.

Approbamus has. In capitulo de electione prioris provincialis. ubi dicitur. eius excessum referant ad capitulum generale scripto communiter sigillato. addatur sic. singulis vero annis. in capitulo provinciali. auditis culpis fiat scrutinium seorsum in conspectu omnium super retencione vel absolucione prioris provincialis. cum expressione nominum et officiorum fratrum. exprimentium vota sua per diffinitores capituli provincialis. quod scrutinium statim in eodem capitulo sigillis diffinitorum provincialis capituli in conspectu omnium sigilletur. et nullatenus publicetur. ac per diffinitorem capituli generalis. vel eius socium. vel socium provincialis in anno provincialium ad generale capitulum deferatur. Et hec eadem forma scrutini facienda de priore conventuali per subpriorum vel eius vicarium in absentia subprioris et duos antiquiores in ordine de conventu presentes in capitulo statim coram omnibus sigilletur. et per socium prioris ad provinciale capitulum deferatur. Ipsi autem scrutatoribus voluntatum precipimus in virtute obediencie. ne dictum scrutinium ex certa sciencia audeant revelare. Et hec habet · ii · capitula.

Item hanc. In capitulo de suffragiis. ubi dicitur. quilibet frater sacerdos celebret in anno · xxx · missas pro fratribus. addatur. et sororibus nostris defunctis. Item in eodem capitulo ubi dicitur. et familiarium receptorum ad beneficia ordinis. addatur. et sepulcorum in cimiteriis nostris. Et hec habet · ii · capitula.

Item hanc. In capitulo de electione magistri. ubi dicitur in principio. statuimus. ut si ante festum sancti Michaelis magistrum mori contigerit. addatur. vel amoveri. Et hec habet · ii · capitula.

Item. In eodem capitulo. ubi dicitur. hoc autem ita fiat ut in secunda feria. etc. deleatur. totum quod sequitur usque. ad hec vero omnia. Et hec habet · ii · capitula.

Iste sunt inchoaciones.

Inchoamus has. In capitulo de electione magistri. ubi dicitur. si autem post dictum festum usque ad pascha magister decesserit. vel a magisterio amotus fuerit; nichilominus hoc supradicto modo per ordinem nuncietur. ut supersedeatur illo anno a capitulo generali. [deleatur totum hoc et dicatur sic]. si vero post pascha magistrum mori vel amoveri contigerit; nichilominus a vicario et diffinitoribus. vel a prioribus provincialibus in anno ipsorum; generale capitulum celebretur.

Item hanc. In eodem capitulo. ubi dicitur. cum duobus fratribus in capitulo provinciali electis. addatur. a pluribus medietate eligencium. et deleatur totum quod sequitur usque ibi. ad capitulum veniant generale.

Item hanc. In capitulo de electione diffinitorum capituli provincialis et generalis. ubi dicitur. si unus defuerit per disquisitionem duorum. addatur. quod si duo defuerint loco ipsorum per disquisitionem duorum antiquiorum in ordine. presencium in capitulo hoc modo eligantur.

Item hanc. In eodem capitulo. ubi dicitur. aliquis de magis ydoneis a maiori parte capituli. addatur. per disquisitionem prioris provincialis et prioris. et subprioris illius loci. ubi capitulum celebratur. vel si unus defuerit; per disquisitionem duorum antiquiorum in ordine presencium in capitulo eligatur. etc.

Item hanc. In capitulo de capitulo generalissimo. post illud ubi dicitur. detur socius a diffinitoribus capituli provincialis. addatur. quod si aliquo casu contingente aliquis prior provincialis non venerit ad capitulum generale; socius a diffinitoribus sui capituli provincialis sibi datus. ad diffinicionem a ceteris provincialibus admittatur.

Item hanc. In capitulo de capitulo generali. ubi dicitur. cum duobus sociis a capitulo suo provinciali electis. addatur. a pluribus medietate omnium eligencium.

Item hanc. In capitulo De itinerantibus. ubi dicitur. extra obedienciam nostri ordinis constitutam. deleatur hoc et dicatur sic. extra ordinem constitutam.

Item hanc. In ordinario in capitulo de translacione festivitatum. ubi dicitur. et in · iva · feria in laudibus. addatur. si vero festum sancti Ambrosii in predicta dominica vel deinceps usque ad dominicam post pascha inclusive contigerit. prima vacante feria post octavas pasche celebretur.

Item. Cum ex causis plurimis insinuat nobis expediens videatur. quod conventus de Gripsvald et de Posvalc de provincia Polonie ad provinciam Theotonie transferantur. inchoamus. quod dicti conventus ad dictam provinciam Theotonie transferantur cum suis terminis.

Iste sunt admoniciones.

Quia ex profectu studii sequitur profectus ordinis. et utilitas animarum; monemus. quod fratres in studio sint amplius solito diligentes. priores autem provinciales et conventuales et eorum vicarii studeant pro viribus studium promovere et severius puniant. quos invenerint negligentem.

Item. Quia profectus studii habet originem ex frequenti et diligenti audientia lectionum; caveant fratres. ne ad scholas deferant libros alios. quam qui leguntur ibidem. et puniantur qui in hoc inventi fuerint delinquentes.

Item. Quia ex missione minus idoneorum ad generalia studia frequenter sequitur turbatio studiorum; iniungimus prioribus provincialibus et eorum vicariis et diffinitoribus capitulorum provincialium. quod non mittant ad studia generalia nisi habiles ad studium; et in moribus approbatos.

Item. Quia experientia docente didicimus ex multiplicacione predicatorum generalium multa inconveniencia contigisse; caveant priores provinciales et diffinitores capitulorum provincialium. a multiplicacione notabili eorumdem.

Item. Quia sub secreti pallio frequenter vicia occultantur. et per consequens correpcio enervatur. monemus et districte iniungimus. quod nullus frater recipiat aliquid sub secreto. quod sit impedimentum correctionis seu quolibet modo alio in preiudicium vel periculum ordinis seu persone.

Item. Quia plerumque contingit aliquos diffinitores generalis capituli de veniendo ad idem capitulum variis casibus impediri; ut status provincialiarum melius notificetur capitulo memorato. volumus et mandamus. quod socii diffinitorum eisdem a priori provinciali et diffinitoribus sui capituli assignati; veniant ad capitulum generale. nisi forsitan impedimento legitimo retrahantur.

Item. Quia nostram honestatem non decet domos. ad quas suspecte persone convenire sunt solite. frequentare; ordinamus et volumus. quod in locis. ubi vigent generalia studia. priores et eorum vicarii non se reddant faciles ad dandas licencias fratribus de visitandis suis scriptoribus. nisi iidem scriptores essent laudabilis conversacionis et fame.

Item. Quia prioribus expedit scire condiciones fratrum suo regimini commissorum; monemus priores provinciales et eorum vicarios. quod quando fratrem aliquem mutabunt de conventu suo. excessu ipsius notabili exigente. eius condicionem significant priori vel eius vicario. ad cuius conventus eum iudicaverint transmittendum. ut circa eum cautela debita valeat adhiberi.

Item. Quia religiosi non competit pecuniam mutuo dare vel accipere sine licencia speciali; volumus et districte iniungimus. quod nullus frater mutuet vel mutuo accipiat pecuniam sine prioris sui licencia speciali. et priores seu eorum vicarii non sint faciles ad huiusmodi licencias concedendas. nisi prius eis significant huiusmodi petentes licencias. quomodo poterunt habere. unde solvant.

Item. Quia non expedit de facili dare licenciam alicui de nostro ordine ad alium transeundi. ne ex hoc ordo veniat in contemptum. inhibemus prioribus conventualibus et eorum vicariis. quod sine prioris provincialis vel eius vicarii licencia. neminem professum in ordine nostro licencient. nisi valde urgens necessitas hoc exposcat.

Item. Quia in multis partibus contra nostra privilegia molestamur. admonemus priores provinciales. quod sint solliciti procurare in curia Romana conservatores in diversis partibus sue provincie. per quos molestatores huiusmodi; valeant cohiberi.

Item. Quia parum prodest moniciones facere. nisi fratres eas studeant observare; iniungimus prioribus universis. quod monicionum capitulorum generalium et provincialium puniant transgressores.

Item. Declaracioni precedentis capituli generalis. qua cavetur. quod constitucio de electione prioris provincialis. que dicit. forma superius posita teneatur; intelligitur a tribus prioribus conventualibus presentibus in capitulo. qui primitus nostri ordinis habitum susceperunt. fratres nullatenus innitantur.

Item. Ordinamus et volumus. quod circa scrutinia priorum provincialium et conventualium servetur ordinacio precedentis capituli generalis.

Item. Inhibemus. ne in conventibus in quibus est studium generale. studentes convocationes faciant nisi forte studentes provincialiarum secundum constituciones ad studium missi cum tribus antiquioribus in ordine de illa provincia. in qua fuerint. conveniant ad tractandum de pertinentibus ad studium. et hoc de prioris provincialis vel conventualis licencia speciali.

Item. Si casu aliquo contingente ad scrutinium prioris provincialis vel conventualis oporteret ad scribendum aliquem advocari preter illos de quibus est ordinatum; precipit illi sic vocato magister ordinis de voluntate diffinitorum. quod scrutinium alicui nullatenus publicet. sed teneat sub secreto.

Item. Cum venerabilis vir memorie recolende fr. Thomas de Aquino. sua conversacione laudabili et scriptis suis multum honoraverit ordinem. nec sit aliquatenus tolerandum. quod de ipso vel scriptis eius aliqui irreverenter et indecenter loquantur. eciam aliter sencientes. iniungimus prioribus provincialibus et conventualibus et eorum vicariis ac visitoribus universis. quod si quos invenerint excedentes in predictis; punire acriter non postponant.

Item. Obitus magistrorum ordinis defunctorum; priores universi vel eorum vicarii in martyrologiis suis. in diebus sui obitus conscribant [vel scribi] faciant diligenter. et ut melius sciant. quomodo scribi debeant; scribant prout inferius continetur. Fr. Raymundus de Penna forti magister ordinis tercius; obiit in die epiphanie. Fr. Iohannes Theutonicus. magister ordinis quartus obiit pridie nonas novembris. Fr. Hymbertus de Romanis. magister ordinis quintus; obiit pridie idus iulii.

Committimus magistro ordinis ordinationem studii Parisiensis. et aliorum studiorum generalium. ut ipse de magistris et bacallariis ordinet et disponat. prout generali utilitati ordinis et fratrum profectui viderit [expedire].

Concedimus provincie Francie · i · domum ponendam apud s. Ioannem de Angelo. Romane provincie · i · ponendam apud Sulmonam. provincie Lombardie; · i · ponendam. ubi priori provinciali et diffinitoribus videbitur expedire.

Ordinationem de domo Duracii factam in precedenti capitulo generali; approbamus.

Absolvimus priores provinciales Ungarie. Polonie. Priores conventuales Parisiensem. Compediensem. et non resumantur provinciales in eisdem provinciis nec conventuales in iisdem conventibus isto anno.

Ista sunt suffragia.

Pro domino papa. et statu universalis ecclesie; quilibet sacerdos · iii · missas. pro venerabili collegio cardinalium; quilibet sacerdos · ii · missas.

Item. Volumus et iniungimus. quod diffinitores presentis capituli et futuri. deducantur de conventu ad conventum. et melius solito procurentur.

Sentencias iudicum approbamus.

Sequens capitulum generale apud Oxoniam assignamus in provincia Anglie. et diffinitores veniant ad capitulum; dominica infra octavas ascensionis.

Actis additae sunt litterae magistri ordinis; cf. app. n. XXXI.